

## "समाजारि थुनफावथाय महरै 'जायखलंआव बेमा जे"

करेन बसुमतारी  
बेंतल फरायसालिमा, बेतल

### 1.1 जागायजेननाय :

जतिन्द्र नाथ बर'आ गोदान बर' थुनलाइ मुलुगनि सासे राफोद थुनलाइगिरि। बर' थुनलाइनि गोबां आयदायाव आखाय होनायजों लोगोसे बर' थुनफावथाय थुनलायावबो गोख्रों आखाय होबोदों। बेफोरनि गेजेराव "जायखलंआव बेमा जे" थुनफावथाया बिथानि गांसे मखजाथाव आबुं समाजारि थुनफावथाय। बिथानि बे थुनफावथाया 2014 इं माइथायाव साफायना दिहुनजादोंमोन। जतिन्द्र नाथ बर'आ जायखलंआव बेमा जे थुनफावथायखौ दिहुननायनि सिगाडावनो गांसे मखजाथाव बेसेनगोसा थुनफावथाय लिरनानै बर' थुनफावथायनि बाखियाव गोबां अबदान होबोदोंमोन। बिथानि बे थुनफावथाय बिजाबा जादों सिगुन राजा (2006)। सिगुन राजा थुनफावथायानो बिथानि गिबिसिन सोरजिनाय बिजाब। बुंनो थाडोब्ला बे गांनै बिजाबनि गेजेरजोंनो बर' थुनलायनि फोथाराव बिथांखौ सासे राफोद फावथायगिरि महरै बयबो बर'फोरानो सिनायथिनो हादोंमोन।

जानो हागौ थुनफावथाय मुगानि गुदि समाव नायगिरि सरासनसा सुबुंफोरनो रंजाहोनो बांसिनै दिन्थिनाय जायोमोन। नाथाय गोदान मुगा हाबनाय लोगो लोगो सुबुं माहारिनि साननाय हनायफोरा सोलायबोनायनि जाहोनाव गोदान मुगानि थुनफावथाय लिरगिरिफोरनि लिरनायनि आदब खान्थिफोरा सोलायबोनो गोनां जाबोदों। आथिखालाव बांसिन थुनफावथाय लिरगिरिफोरनि लिरनायखौ सुबुं समाजनि गुदु-गादा जेंना, गाज्जि आखल आखु, गांनाय उखैनाय बायदि बिथिंफोरखौ बिथा खालामनानै लिरनाय नुनो मोनसै। जतिन्द्र नाथ बर' बिथाडाबो आथिखाल गोदान मुगानि थुनफावथाय लिरगिरि जिहितु बिथानि थुनफावथायफोरावबो सुबुं समाजनि जेंना-जेंगोनाफोरानो बांसिनै जायगा लागोन बियो रोखा। बिथानि गिबिसिन सोरजिनाय सिगुन राजा थुनफावथायखौ नायोब्ला नुनो मोनोदि आथिखाल सुबुं समाजाव राजखान्थिया माबादि गोहोम खोखलैनो हायो आरो राजखान्थियारि गोहोआव थानानै गोहो गोनांफोरा गोहो गैयैफोरखौ माबादियै सासन खालामो बेफोरनि गोथां सावगारिफोरखौ रोखा गुमुर होदों। बेबायदिनो बिथानि जायखलंआव बेमा जे थुनफावथायाबो सुबुं समाजाव जाफ्लेबाय थानाय थासारि एबा जाथायफोरखौ बिथा खालामनानै लिरनाय। समाजारि जाथाय एबा थासारिखौ बिथा खालामनानै लिरनाय जिहितु बे थुनफावथायावबो सुबुं समाजनि समाजारि सावगारियानो आबुडै हाबनानै थागोन। गाहायाव जायखलंआव बेमा जे थुनफावथायाव बेरखानाय बर' सुबुं समाजनि समाजारि सावगारिखौ सावरायनो लानाय जादों।

### 1.2 बेखेवनाय :

गोजौआवनो बुंबोखानाय जादोंदि जतिन्द्र नाथ बर'नि जायखलंआव बेमा जे थुनफावथाया 2014 इं माइथायाव ओंखारनाय गांसे आबुं समाजारि थुनफावथाय। थुनफावथायखौ जागायजेननायनिफ्राय जोबजासिम नायोब्ला जों नुनो मोनोदि, फावथायगिरिया बे फावथायाव गाहायै अखां मुंनि सासे सेंग्रानि आखुथाय होनायजों लोगोसे गंथाम नख'र (बुंसार गयारि, नारजां बर', दि हारांगा) आव थानाय आखुगिरिफोरनि नख'राव जानाय जाथाय

फिनजाथायफोरखौ लानानै लिरलांदों। नख'रारि जाथाय फिनजाथायफोरखौ लानानै लिरनाय जिहितु बेयाव सुबुं समाजनि समाजारि सावगारिया एसेब्लाबो बेरखांनायखौ नुनो मोनखागोन। बेनिखायनो बे थुनफावथायाव बेरखांनाय समाजारि सावगारिखौ गाहायाव सावरायनो लानाय जाबाय।

बर'फोरा गोदो गोदाय मिथिस'हायै समनिफ्राइनो आबाद मावनानै जाग्रा मोनसे गिदिर हारि। आबाद मावनायखौनो थांना थानायनि गुदि राहा लामा खालामनानै लाबोदों। आबाद मावनायजों लोगोसे दैमा - दैसा आरो अरनबारियाव मोननाय ना सम' खांख्राय आरो बायदि रोखोमनि जिब जुनारफोरखौबो मैहुर खालामना जाबोनायखौ नुनो मोनबोदों। जेब्लानो सम मोनो अब्लानो गामिनि बर' आयजोफोरा ज' ज' जालायनानै दैमा दैसाफोराव ना साम' खांख्राय लायनानै जाबोनाय नुनो मोनबोदों। बेफोर बर'नि हुदाखौ नायोब्ला बर' समाजनि समाजारि आखुथाय होनना बुंनो हायो मानोना, बर'फोरा बेफोर हुदाखौ समाजाव थानानै गोदो गोदायनिफ्रायनो मावबोबाय थाबोदों। जतिन्द्र नाथ बर'नि जायखलंआव बेमा जे थुनफावथायावबो बेफोर बर'फोरनि ना साम' खांख्राय लायनानै जाबोनाय हुदाखौ फावथायनि सासे आखुगिरि लाबारिनि गेजेरजों रोखा नुनो मोनदों। थुनफावथाया जागायजेननाय समावनो लाबारिया गामिनि दैमायाव जेखाय खबाय लानानै ना गुरबाय थानाय सावगारिखौ नुनो मोनो। अखांआ टाउनफ्राय बिमायमोननि गामियाव फैबाय थानाय समाव लाबारिनि ना गुरबाय थानायखौ नुनानै नाखुमानाय, जंखायनाय आरो उनाव लाबारिया गावनाव बेलाव बानायखौ बोखाना गारहरनाया अखांनि गस्ला सिफियाव हाबफैजानानै होसिखावनाय थासारि जायो। लोगोसे बे बायदि गिनानै होसिखावबाय थानाय समावनो दोबोलिया फैनानै अखांनि गस्ला सिफिनि बेलावखौ बोखाना होलायनाय सावगारिया जायो। बेनिफ्राय जों मिथिनो हायो जे बे थुनफावथायाव बर'फोरनि ना गुरनाय समाजारि सावगारिया रोखायै बेरखांदों।

जायखलंआव बेमा जे थुनफावथायनि गुबुन मोनसे समाजारि सावगारिया जाबाय रां रुफा, धोन सम्फथि गैयिनि फिसाजो बिलायनो (हाबा हरनो) हायि। बर'फोरनि समाजाव मोनसे हुदाया गोदो गोदायनिफ्रायनो सोलिबोदों, बे जादों सोरनिबा नख'रनि फिसाजोआ हाबा हुखा मावनो रोडाब्ला आरो बिमा बिफाया नख'रनिफ्राय जुलि होनानै हरनो हायाब्ला एबा धोन सम्फथि हरफानो हायाब्ला फिसाजो बिलायनो हानाया जोबोर गोब्राबमोन। बेफोरबायदि बर' समाजनि हुदाया गोदो गोदायनिफ्रायनो लानानै आथिखालसिमबो सोलिगासिनो थानायखौ नुनो मोनो। बेबायदिनो जायखलंआव बेमा जे थुनफावथायावबो बर' समाजनि बेबायदि थार समाजारि सावगारिखौ नुनो मोनो। थुनफावथायाव आखुगिरि मह्रै जायगा मोननाय बुंसार गयारिया सासे गुदि फरायसालिनि जिरायमोननाय फोरोंगिरिमोन। बिहा नायल' जाल' सासेल बांबुला मुंनि फिसा हौवा आरो नायल जाल सासेल दोबोली मुंनि फिसा हिनजाव दंमोन। खाफाला जोबोर गाज्जिदि बियो सासे जिरायमोननाय फोरोंगिरिब्लाबो नख'रनि आंखालजों बुगिनांनाय एबा नख'रखौ गोजौ थाखोनि खालामनो हायाखै। जायनि थाखाय गावनि आंगो फिसाजो दोबोलीखौ गुबुन नख'राव बिलायनो हानाय थासारिखौ खालामनो हायाखै। खेबसे नडा खेबनै खेबथाम जाबाय जुलिनि थाखाय दोबोलीखौ नायनो फैनाया नाथाय खाफाल गाज्जि खेबसेबा धोन सम्फथि हरफानो हायिनि आरो खेबसेबा ननिफ्राय जुलि खालामना हरनो हायिनि थाखाय खेबफ्रोमावबो फेलें जानो गोनां जादों। बेफोर खोथाखौ लानानैनो बुंसार गयारिया जोबोर दुखु जायोमोन आरो फिसाजो दोबोलियाबो लाजिनायजों सहायनो हाया जायोमोन। सानसेखालि बेफोरबादि दुखु दाहानि समावनो अखां मुंनि सासे सेंग्राया दोबोलीखौ लोगो मोनो आरो अखांआ धोन सम्फथिफोरखौ लुबैनाय गैया जासे अरायनि थाखाय दोबोलीखौ बजबना लानो खोथा होयो। थुनफावथाया जोबनाय फारसेथिं नाथाय बेफोर खोथा होनायाबो दोबोलीनि जिउआव गैया जाहैयो। बेबायदिनो थुनफावथायाव दोबोलीनि जिउआव जुलि जानायनि बरादखौ नुनो मोनहैनाय जाया। थुनफावथायनि बेफोर गासै समाजारि जाथायफोरखौ नोजोर होनानै जों बुंनो हायोदि, बर' समाजाव बेफोर हुदाया दोहौ सिरखारदोंमोन आरो बे दोहौखौनो थुनफावथायगिरिया जायखलंआव बेमा जे थुनफावथायाव रोखायै बेरखां होदों।

जोनोम, हाबा आरो थैनाय बे मोनथाम खोलोबखौ सुबुं माहारिनो ईसोरानो दानानै हरखादों। जेराव जोनोम दं बेयाव हाबा आरो थैनायाबो लोगोसे दं। बर' सुबुं समाजाव हाबा खान्थिखौ गाहायै () बे मोनद' बाहागोआव रानलानायखौ नुनो मोनो लोगोसे बेफोर मोनद' हाबा खान्थिनि गेजेरजोंनो बर' समाजाव हाबा होनायखौ नुनो मोनो। बुंनो गोनां खोथाया बेसोदि हाबा होनाया मोनफा समाजारि सावगारि जेहिथु बे मोनद' खान्थिजों हाबा होनायखौबो मोनफा मोनफा बर' समाजनि समाजारि सावगारि होनना बुंनो हायो। फोरमायनांगौ खोथाया बेनोदि जायखलंआव बेमा जे थुनफावथायाव गोरजिया थानाय खान्थिखौ नुनो मोनो। थुनफावथायनि सासे आखुगिरि नारजां बर'आ मोनसे समाव ष्टिल इण्डाष्ट्रीआव मेनेजार हिसाबै खामानि मावोमोन। मोनसे समाव बे ष्टिल इण्डाष्ट्रीनि बिगुमाया थैना थानायनि उनाव बिगुमानि खावलायनायबादि फिसाजो मोदानस्रिखौ जुलि खालामनो गोनां जायो आरो जुलिनि उनाव ष्टिल इण्डाष्ट्रीनि बिगुमा जानानै बे नखरावनो थानो गोनां जायो। थुनफावथायनि बे जाथायखौ नायोब्ला नारजां बर'आ सासे नखरनि पावार गोमा जानाय सुबुं। बेनिफ्राय जों मिथियोदि बे थुनफावथायाव गोरजिया थानाय हाबा खान्थि समाजारि सावगारिया रोखा बेरखांदों।

बर' सुबुं समाजाव देवानि खालामनाय आखुआ दिनैसिमबो सोलिनाय नुनो मोनो। देवानि खालामनाया गुबुन गुबुन बिथिडाव जानो हागौ आरो खामानिखौ लानानै बेयो आलादा आलादा जायो। जतिन्द्र नाथ बर'नि जायखलंआव बेमा जे थुनफावथायाव रोखा रोखा बेरखांधाराखैब्लाबो दसे समनि थाखाय देवानि जानानै रायलायना होनाय सावगारिखौबो नुनो मोनो। जेब्ला नारजां बर' आरो मोदानस्रिनि नायल' जाल' सासेल फिसाजोआ गावनि मोजां मोननाय अनसुलाजों गोरबोआव थाम दाननि गथ थासेयावबो नागार जादोंमोन अब्ला जेबो राहा गैथारैनि बिमा मोदानस्रिया सासे साखिआवला नार्जारीखौ लेंहरना फिसाजोनि थाखाय हरखाबै बिजामादै नागेरना होनांगौनि थाखाय गावनि न'आव लेंहरो। नार्जारीनि आखायाव सेंग्रा दडब्लाबो हाथखिनि बेबायदि हालोदरखौ बजबना लानो हायिनि थाखाय जोबथारनायाव अखांखौ रायलायना होनाय बेफोर थुनफावथायनि जाथायफोरखौ नायोब्ला नार्जारीआ सासे साखिआवलाब्लाबो देवआनिनि महर लादों होनना बुंनो हायो, आरो बेफोर बर'फोरनि समाजाव जाबायथाग्रा हिसाबै बेखौ थनफावथायाव बेरखांनाय समाजारि सावगारि होनना बुंनो हायो।

दाहोना, रुवाथि, मावग्रा-दांग्रा लानानै बर'फोरा गोदो गोदायनिफ्रायनो नखर संसार सोलिबोदों। बेफोरबादि लानानै नखर सोलिबोनाया गुबुन हारि माहारिनि गेजेराव जायो जाया बेखौ बुंनो थाडा नाथाय बेफोर हुदाया बर' समाजाव गोदो गोदायनिफ्रायनो सोलिबोनाय आरो दासिमबो सोलिगासिनो दं। बबेबा गंसे बर' नख'रा ग्रोम ग्रोम जायो, मावनो दांनो हाख'आ जायो आरो सोरनिबा बर' नख'रा साखि बाखि गोनां गिदिर नख'रब्ला दाहोना रुवाथि एबा मावग्रा-दांग्रा लानानै नख'रखौ सामलायनो गोनां जायो। बेबायदिनो जायखलंआव बेमा जे थुनफावथायाव बांबुला मुंनि सासे देरफुनाय सेंग्रासाया नारजां बर' आरो मोदानस्रिमोननि गिदिर नख'राव सासे दाहोना बायदि मावग्रा महरै जायगा मोन्दों। थुनफावथायाव बेरखांनाय बेखौ नायोब्ला थारैनो बर' नख'रनि मावग्रा-दांग्रा लानानै नख'र सामलायनाय समाजारि सावगारिया रोखा बेरखांदों।

जायखलंआव बेमा जे थुनफावथायाव बेरखांनाय फिसा समाजारि सावगारिया जाबाय सिनेमा लायेनआव ओंखारनानै गाव गावनि नख'रखौ सिलिंखार खालामनाय। सिगां समाव बेबायदि सिनेमा लायेनआव ओंखारनानै नख'र सिलिंखार जानायखौ नुनो मोनाब्लाबो नाथाय आथिखालाव गोबांनि नख'राव नडाब्लाबो माखासे नख'रफोराव नख'र सिलिंखार जानाय बर' समाजाव नुनो मोनसै। जों बुडा गासैबो सिनेमा लायेनआव ओंखारोब्लानोदि नख'र सिलिंखार जायो, नाथाय आथिखालाव गोबां बर' सुबुंफोरा गावनि गोसोखौ हमथानो हायियाव नख'र सिलिंखार जानायखौबो नुनो मोनो। बेबायदिनो जायखलंआव बेमा जे थुनफावथायाव सासे ष्टिल इण्डाष्ट्रीनि बिसि मोदानस्रिया सिनेमा लायेनआव ओंखारनानै गावनि नख'र आरो गावनि फिसा फिसौफोरखौ जाबादि जोथोन लानांगौमोन बिदि लानो हायाखै जायनि थाखाय बिसोरनि नख'र संसारा जोबनाय फारसे सिलिंखार

जाहैनो गोनां जादोंमोन। थुनफावथायनि बेफोर जाथायखौ नायोब्ला आथिखाल बर' समाजजों खाब जाथारदों होनना बुंनो हायो। बे समाजारि सावगारिया गोजामथार नडाब्लाबो आथिखालनि थासारिजों गोरबनाय जेहिथु थुनफावथायनि बे जाथायखौबो समाजारि सावगारि होनना बुंनो हायो।

### 1.3 फोजोबनाय:

जायखलंआव बेमा जे थुनफावथायनि समाजारि सावगारिनि सायाव गोजौआव सावरायबोनायनि गेजेरजों थुनफावथायनि गेजेरजोंदि मोनसे हारिनि समाजारि सावगारिया रोखा रोखा बेरखांनो खाबु मोनो लोगोसे समाजनि गाज्जि एबा गेना गोरान्थि थासारिफोरखौ फोसाबना लानो खाबु मोनो बेखौ रोखा बुंनो हायो। जोबथारनायाव बेखौल' बुंनानै फोजोबनो सानबायदि गोजौआव आं जायफोरखौ मिथिनानै नुनानै एबा नोजोराव गोग्लैनानै सावरायबोबाय बिनि अनगायैबो माखासे आंनि नोजोरजों मिथिस्ताबै एबा नोजोर होप्लाडै माखासे फिसा फिसा समाजारि सावगारिफोरा थाबावनो हागौ। बेफोर जेखि जाया मानो आंनि फारसेनिफ्राइ गोजौनि जाखिनि नोजोराव गोग्लैनानै सावरायबोबाय बेफोरखौ नायनानै जतिन्द्रनाथ बर'नि जायखलंआव बेमा जे थुनफावथाया गांसे आबुं समाजारि थुनफावथाय। बिथां लिरगिरिया गावनि थुनफावथायनि गेजेरजों समाजनि गेना गोरान्थिफोरखौ आसि थुयै थुयै होनानै बर' समाजखौ फोसाबनो नाजानायखौ नुनो मोनो।